

అపొస్తుడు ఆతి పవులు ఎపెసుదు మని దేవుణుదిజ్ నమ్మితి వరిజ్ రాస్తి ఉత్తం

నెల్ల కిబిస్సిక

అపొస్తుడు ఆతి పవులు ఎపెసు ఇని పట్టుమ్దు మని దేవుణు సజమ్దిజ్ రాసిని ఉత్తమ్నె యాక. యా ఉత్తం రాస్తి మహివలె, వాండ్రు రోమ జెలిదు తొహ ఆత మహాన్. నస్తివలె ఆసియ ఇని రోమ ప్రాంతమ్దు మని ఉండ్రి ముకెలమాతి పట్టుమ్నె ఎపెసు.

పవులు యా ఉత్తం రాస్తాండ్రి, తుకికు వెట పొక్కినాన్. దేవుణుదిజ్ నమ్మిత్తికార్, వన్ని దయ దర్మం ఎసా గొప్ప పెరిక ఇజి వారు అర్దం కిజి నెస్టెజ్ రాస్తికాదె. మరి దేవుణు ఎత్తు కిత్తి సజతిజ్ క్రీస్తు వెటనె పూర్తి ఆతె. వాండ్రి విజు వన్కా ముస్సు మనికాన్. క్రీస్తు వెటనె దేవుణు యూదురిజ్, యూదురు ఆఇ వరిజ్ రక్కిసి వరిజ్ ఉండ్రి ఒడోల్ కిజినాన్. ఇబ్బి ఒడోల్ ఇజి వెప్పినిక, యా లోకమ్దు మని దేవుణుదిజ్ నమ్మిత్తికార్ విజెరె కూడితి మని సజమ్నె. మరి దేవుణు సజం ఎలాగ ఉండ్రి ఆజి మండ్రిజ్ నమ్మిత్తికార్ ఒరెన్ ఒరెన్ ఎలాగ మండ్రిజ్ ఇజి వెప్పినాన్. నమ్మిత్తికార్ ఎద్రిసినిక యా లోకమ్ది లోకుర్ వెటనె ఆవద్. గాని సయ్తాను వెటనె ఎద్రిసినిక ఇజి ఎత్తు కిబిసి, ఎలాగ సయ్తానుజ్ ఎద్రిస్టెజ్ ఇజి వెప్పినాన్.

¹ క్రీస్తు యేసు వందిజ్ అపొస్తుడు ఆతి పవులు ఇని నాను ఎపెసు పట్టుమ్దు మని దేవుణు వందిజ్ కేట ఆతి వరిజ్ రాసిని ఉత్తం. దేవుణు ఎత్తు కిత్తి వజనె నాను క్రీస్తు యేసు వందిజ్ అపొస్తుడు ఆత. మీరు క్రీస్తు యేసుజ్ నమ్మిజినె మనికిదెర్.

² మా బుబ్బి ఆతి దేవుణుని ప్రబు ఆతి యేసు క్రీస్తు దయ దర్మమ్దాన్ మీరు నిపాతిదాన్ మండ్రిజ్ సాయం కిపిర్.

3 దేవుణుడిజ్ఞ పొగిడిజినాట్. వాండ్రె మా ప్రబు ఆతి యేసు క్రీస్తు దేవుణు. మరి వాండ్రె వన్ని బుబ్బబా. ఎందనిజ్ ఇహిజ, దేవుణు ఆత్మ మా మన్నుదిజ్ వెహ్సి, వన్ని సరిదు నడిపిన్నిదనితాన్ మజి వాజిని విజు నెగ్గికెజ్ సీజి వాండ్రె మజి దీవిస్తాన్. పరలోకమ్దాన్ వాజినికెజె అయా నెగ్గికెజ్. క్రీస్తు వెట మజి కుడుప్తాండ్రె, యా నెగ్గికెజ్ మజి సితాన్.

4 ఎందనిజ్ ఇహిజ దేవుణు లోకం పుటిన్ఎండ ముజాలె మజి వన్ని లోకుర్ ఇజి ఎర్లిస్తాన్. క్రీస్తు వెట మజి మని నమమ్దమ్దాన్ యా లెకెండ మజి ఎర్లిస్తాన్. మాటు వన్ని వందిజ్ కేట ఆతి లోకుర్ లెకెండ, ఇని నిందెజ్ సిల్లెండ వన్ని ఎర్దు మండ్రెజ్నె వాండ్రు యా లెకెండ ఎర్లిస్తాన్.

5 వాండ్రు మజి ప్రేమిసినాన్. అందెజె యేసు ప్రబు మా వందిజ్ ఆతి దనితాన్ మాటు వన్ని కొడోర్ ఆదెజ్ ఇజి నండో ముజాలె వాండ్రు తిరుమానం కిత్తాన్. వాండ్రు యా లెకెండ తిరుమానం కిత్తాన్. ఎందనిజ్ ఇహిజ, అయాకదె వాండ్రు ఎత్తు కిత్తిక. వన్నిజ్ ఇన్టం ఆతిక.

6 అందెజె గొప్ప బమ్మ కిని వన్ని దయ దర్మం వందిజ్ దేవుణుడిజ్ పొగిడిజినాట్. వాండ్రు ప్రేమిసిని వన్ని మరిసి ఆతి దని దనటానె యా గొప్ప దయ దర్మం మా ముస్సు వాతాద్. మజి సెడ్డినె దొహ్కాద్.

7-8 క్రీస్తు మా వందిజ్ నల వాక్సి సాతి సావుదాన్ దేవుణు మా పాపమ్కాణిజ్ మజి డిస్పిస్తాన్. ఇహిజ మా పాపమ్కు సెమిస్తాన్. అయా లెకెండ వన్ని దయ దర్మం గొప్ప పెరిక ఇజి తోరిస్తాన్. మా ముస్సు నండో దయ దర్మం సెడ్డినె తోరిస్తాన్. వన్ని బుద్ది గెణమ్దానె వాండ్రు వన్ని దయ దర్మం మా ముస్సు తోరిస్తాన్.

9 దేవుణు ఎత్తు కిత్తిక వాండ్రు కిత్తాన్. క్రీస్తు వెట పూర్తి కిదెజ్ ఇజి వాండ్రు వన్ని గర్బమ్దు ఎత్తు కిజి డాప్పి ఇట్టి పణి మజి తోరిస్తాన్. అయాక ముజాల్ ఎయెర్బా నెన్ఎతార్.

10 వాండ్రు గర్బమ్దు ఎత్తు కిజి డాప్పి ఇట్టిక ఇనిక ఇహిజ, పరలోకమ్దు మని విజు వన్యాజ్, బూమి ముస్సు మని విజు వన్యాజ్, కూడుప్పి ఒరెన్ వన్ని అడిగి ఇట్తాన్. వాండ్రె క్రీస్తు. యాక

కిదెజ్ తగితి సమయం వానివలె వాండ్రు పూర్తి కినాన్.

11 విజు సజతిజ్ దేవుణు ఎత్తు కిత్తి వజ వాండ్రు కిజినాన్. క్రీస్తు వెట మజి కుడుప్తాండ్రె, వన్ని సొంత లోకుర్ ఇజి మజి ఎర్లిస్తాన్. ఎందనిజ్ ఇహిజ అయా లెకెండ్రె ఎర్లిస్తెజ్ ఇజి వాండ్రు పూర్బమదునె తిరుమానం కిత మహాన్. అయాకదె వాండ్రు ఎత్తు కిత్తిక.

12 క్రీస్తు రక్తిస్తెజ్ వానాన్లె ఇజి విజెరె ఇంక ముజాలె నమకం ఇట్టికాపె యూదురు ఆతి మాపు. అందెజె దేవుణు గొప్ప పెరికాన్ ఇజి పొగిడిజినాన్. అయాకదె వన్ని ఉదెసం.

13 అయాలెకెండ్రె యూదురు ఆజ మిరుబ నిజమాతి బోద వెహిదెర్ ఇహిజ, దేవుణు మిజి రక్తిస్తాన్లె ఇజి వెహిని సువార్త వెహిదెర్. మీరు క్రీస్తు ముస్సు నమకం ఇట్టిదెరె వన్ని వెట కూడితి మనిదెర్. అందెజె దేవుణు సీన ఇజి ఒట్టు కిత్తి దేవుణు ఆత్మెజ్ మిజి సితాన్. సితండ్రె దేవుణు మిజి లోకుర్ ఇజి కూక్తాన్. యా దేవుణు ఆత్మనె, మీరు దేవుణు లోకుర్ ఇని దనిజ్ ఉండ్రె గుర్తు.

14 మరి దేవుణు వన్ని లోకురిజ్ ఒట్టు కిత్తి విజు మజి దోహ్కెఇని దనిజ్ ఉండ్రె ఆదారమనె యా దేవుణు ఆత్మ. వాండ్రు వన్ని లోకురిజ్ పూర్తి విడుఁదల కినివలె అయాకెజ్ మిజి దోహ్కె. దేవుణు గొప్ప పెరికాన్ ఇజి దినితాన్ లోకుర్ పొగిడినార్.

ఎపెసు సజమదు మని వరి వందిజ్ పవులు కిజిని పార్దనం

15-16 దేవుణు మిజి ముస్సు వెహి లెకెండ్రె దీవిస్త మనాన్. అందెజె నాను మీ వందిజ్ వన్నిజ్ పార్దనం కిజిన. మీరు ప్రబు ఆతి యేసుజ్ నమ్మిజినిదెర్. దేవుణు వందిజ్ కేట ఆతి వరిజ్ విజెరిజ్ ప్రేమిసినిదెర్ ఇజి నాను వెహి బాణిజ్ అసి మీ వందిజ్ ఎస్తివలెబా డిఁసెండ్రె దేవుణుదిజ్ వందనమ్కు వెహిన. ఎస్తివలెబా నాను పార్దనం కినివలె, మీ వందిజ్ పార్దనం కిజిన.

17 గొప్ప పెరికాన్ ఆతి మా బుబ్బెజ్ పార్దనం కిజిన. వాండ్రె మా బుబ్బ ఆతి యేసు క్రీస్తుజ్ దేవుణు. మీరు వన్నిజ్ బాగ నెన్ని వందిజ్

దేవుణు అత్తు మిజి గెణం సిదెజ్ ఇజి, దేవుణు వందిజ్ మిజి తెలివి కిబిసైజ్ ఇజి నాను వన్నిజ్ పార్లనం కిజిన.

18 దేవుణు వందిజ్ కేట అతి లోకుర్ వందిజ్ వాండ్రు ఇట్టి మని గొప్పు పెరి దీవెనమ్కు ఇనికెజ్ ఇజి మీరు నెస్సి వందిజ్, అయా దీవెనమ్కాజ్ ఆనదాన్ ఎద్రు సూణి వందిజ్ వరిజ్ నెస్సిన్ అ ఇజి నాను పార్లనం కిజిన. దేవుణు వన్ని లోకురిజ్ సీన ఇజి ఒట్టు కిత్తి దీవెనమ్కు ఎసొ పెరికెజ్ ఇజి మీరు నెస్సెజ్ ఇజి నాను వన్నిజ్ పార్లనం కిజిన.

19-21 వన్నిజ్ నమ్మిజిని మా లొఇ మని వన్ని సత్తు ఎసొ పెరిక ఇజి మీరు నెస్సెజ్ ఇజి నాను పార్లనం కిజిన. అయా సత్తు విజు వన్కా ముస్కు గొప్పు పెరిక. యా గొప్పు పెరి సత్తుదాన్ నె దేవుణు క్రిస్తుజ్ సావుదాన్ బత్తిస్తాండ్రె పరలోకమ్దు వన్ని ఉణెర్ పడకాదు బసె కిత్తాన్. క్రిస్తు అబె అతికారం కిజినాన్. విజు రకమ్కాణి అతికారం కిజిని దూతెజ, దెయమ్క ముస్కు అతికారం కిజినాన్. అతికారం కిజిని విజెరి ముస్కు వాండ్రె గొప్పు అతికారం మనికాన్. వన్ని అతికారం ఏలు అతికారం కిజిని వరి ముస్కునె ఆవద్. గాని వాని కాలమ్దు అతికారం కిని వరి ముస్కుబా వాండ్రె గొప్పు అతికారం మనికాన్.

22 దేవుణు విజు వన్కాజ్ క్రిస్తు పాదమ్క అడిఃగి ఇట్టాన్. దేవుణు సజం ముస్కు అతికారి లెకెండ వన్నిజ్ ఏర్పాటు కిత్తాన్.

23 వాండ్రు దేవుణు సజమ్దిజ్ బుర్ర లెకెండ దేవుణు సజమ్నె వన్ని ఒడొల్ లెకెండ దేవుణు సజమ్నె వన్నిజ్ పూర్తి కిజినాద్. ఎంబెబా విజు వన్కాజ్ పూర్తి కిజినికాన్ వాండ్రె.

2

దేవుణు వన్ని కనికారమ్దాన్ మజి రక్కిసినాన్.

1 మీరు క్రిస్తుజ్ నమ్మిఇ ముజాల సాతి వరి లెకెండ మహిదెర్. ఎండనిజ్ ఇహిజ మీరు దేవుణుదిజ్ లొజిఇతిదెర్, నెఇ పణిజ్ కిజి మహిదెర్.

2 యా లోకమ్దు మని దేవుణుదిజ్ దూసిస్సికార్ కిజి మహి లెకెండ మీరుబా కిజి మహిదెర్. ఆగాసమ్దు బుల్లెయ్ కిని దెయమ్కాజ్ నెయ్కి ఆతి సయ్తానుజ్ లోజీజి మహిదెర్. వీండ్రె దేవుణుదిజ్ లోజీజి వరి ముస్సు ఏలు అతికారం కిజినాన్.

3 ఉండ్రె కాలమ్దు, నిజమె, మాటుబా నని వరి లెకెండ మహట్. మా సొంత సెఇ ఇస్టమ్దానె కిజి మహట్. మ ఒడొలీది ఆసిజి వజ, సెఇ ఆలోసమ్క వజ కిజి మహట్. మహి విజెరె లెకెండ, మాటుబా దేవుణు కోపమ్దిజ్ గురి ఆతి మహికాట్.

4 గాని దేవుణు నండొ కనికారం మనికాన్. వాండ్రు మజీ నండొ ప్రేమిసినాన్.

5 అందెజె మజీ క్రీస్తు వెట కుడుప్తాండ్రె మజీ కొత్త బత్సు సితాన్. మాటు దేవుణుదిజ్ లోజిఎండ ఆతి మహిజ్, సాతి వరి లెకెండ మహట్. అయావలెబా వాండ్రు యా లెకెండ కొత్త బత్సు సితాన్. దేవుణు దయాదర్మదానె వాండ్రు మజీ రక్సిస్తాన్.

6 వాండ్రు మజీ క్రీస్తుయేసు వెట సావుదాన్ మరజి బత్సిస్తాండ్రె, పరలోకమ్దు వన్ని వెట కూడఃజి ఏలుబడిః కిదెజ్ బసె కిత్తాన్. క్రీస్తు వెట మజీ కుడుప్తాండ్రె యా లెకెండ కిత్తాన్.

7 వాని కాలమ్దు లోకుర్ విజెరె వన్ని దయ దర్మం విజు వన్కా ముస్సు గొప్ప నండొ పెరిక ఇజి సుడఃదెజె యా లెకెండ క్రీస్తు వెట మా ముస్సు దయ దర్మం తోరిస్తాన్.

8 ఎందనిజ్ ఇహిజి దేవుణు, దయాదర్మమదానె మిజి రక్సిస్తాన్. మీరు క్రీస్తుజ్ నమ్మిత్తి దనితానె రక్సిస్తాన్. మీరు కిత్తి నెగ్గి పణిజాణిజ్ ఆవద్ వాండ్రు మిజి రక్సిస్తాన్. అయాక వాండ్రు మిజి సీతి ఉండ్రె ఇనాయమ్నె.

9 మీరు కిత్తి నెగ్గి పణిజాణిజ్ ఆవద్ దేవుణు మిజి రక్సిస్తాన్. అందెజె ఎయెనబా నాను కిత్తి నెగ్గి పణిజాణిజ్ దేవుణు నజి రక్సిస్తాన్ ఇజి పొజిదెజ్ ఆవద్.

10 మాటు నెగ్గి పణిజ్ కిజినె మంజని వందిజ్ క్రీస్తు యేసు వెట మజీ కుడుప్తాండ్రె కొత్త బత్సు మజి సితాన్. మాటు కిదెజ్ మని యా నెగ్గి

పణిజ్ వాండ్రు ముజాలె తిరుమానం కితాండ్రె ఇట్టాన్. నిజమె దేవుణు ఒరెండ్రె యా లెకెండ్ మా బత్తుదిజ్ కొత్తాజ్ కిత్రాన్.

11 అందెజె యూదురు జాతిదు పుట్ఇతి మీరు క్రీస్తుజ్ నమ్మిఇ ముజాల ఎలాగ మహిదెర్ ఇజి ఎత్తు కిదు. మీరు సునతి కిబె ఆఇకిదెర్ ఇజి యూదురు మిజి వెహ్సినార్. ఎందనిజ్ ఇహిజ, వారు సునతి కిబె ఆత మనార్. అందెజె వారు దేవుణు లోకుర్ ఇజి ఒండొబిజినార్. (గాని యా సునతి ఒరెన్ వన్ని ఒండొల్దు కిని ఆసారమ్సె)

12 సుండొదు, అయా కాలమ్దు మీరు క్రీస్తుజ్ దూరం మహిదెర్. దేవుణు లోకుర్ ఆతి ఇస్తాయేలుదిజ్ సెందిఇకిదెర్. మీరు పయివారు. దేవుణు వన్ని లోకురిజ్ కిత్తి ఒట్టుదిజ్ సమందం సిలికిదెర్. మీరు యా లోకమ్దు ఇని ఆన సిల్లెండ, దేవుణుదిజ్ నెన్ఎండ బత్కిజి మహిదెర్.

13 గాని ముజాల క్రీస్తుజ్ దూరం మహి మీరు ఏలు వన్ని వెట కూడితి మనిదెర్. క్రీస్తు నల వాక్సి సాతి సావుదాన్ దేవుణు మిజి డగ్రు కిత్రాన్.

14 క్రీస్తునె యూదురు ఆఇ మిజి, యూదురు ఆతి మజి రాజినం కిబిస్తికాన్. ముజాల మిజి మజి అడ్డు లెకెండ్ మహి పగ వాండ్రు లాగితండ్రె, ఉండ్రె నన్ని లోకుర్ కిత్రాన్.

15 యూదురి రూలుదు మని ఆడ్రెజ, రూలుజ క్రీస్తు వన్ని ఒండొల్దు సాతి సావుదాన్ వన్కాజ్ సత్తు సిల్లెండ కితాండ్రె, అడు లెకెండ్ మహి పగ లాగితాన్. ఎందనిజ్ ఇహిజ, రుండి లోకురిజ్ ఇహిజ, యూదురిజ్, యూదురు ఆఇ వరిజ్ వన్ని వెట కుడుప్పి ఉండ్రె నని కొత్త లోకు కిత్రాన్. యా లెకెండ్ వాండ్రు రాజినం కిబిస్తాన్.

16 మరి సిలువాదు సాతి సావుదాన్ వాండ్రు రుండి జాతిజ నడిమి మహి పగ సొన్సిసి, ఉండ్రె నని లోకుర్ లెకెండ్ కిజి, దేవుణు డగ్రు మరజి తతెజ్ యా లెకెండ్ రాజినం కిబిస్తాన్.

17 క్రీస్తు యా లోకమ్దు వాతండ్రె, దేవుణుదిజ్ దూరం మహి యూదురు ఆఇ మిజి, వన్ని డగ్రు మహి యూదురు ఆతి మజి సమాదనం సిజిని సువార్త వెహ్సాన్.

18 వన్ని వెట మజి రిఎరిజ్, ఇహిజ యూదురు ఆఇ మిజి,

యూదురు ఆతి మజి, బుబ్బు ఆతి దేవుణు ముజాల దయ్‌రమ్‌దాన్ సొండ్రెజ్ వన్నిజ్ లొస్తైజ్ అక్కు దొహ్‌క్తాద్. యాక దేవుణు ఆత్మ వెట మజి దొహ్‌క్తాద్.

19 అందెజె మీరు ఏలుదాన్ పయిదికిదెర్ ఆఇదెర్. దేవుణుదిజ్ సెందిఇకిదెర్ ఆఇదెర్. గాని మీరు దేవుణు లోకుర్ వెట అక్కు ఆతికిదెర్. దేవుణు కుటుమ్‌దికిదెర్.

20 ఉండ్రె ఇల్లు పణకాణిజ్ తొప్పొలెకెండ మీరు మనిదెర్. దనిజ్ పునాది ఆతికార్ ప్రవక్తరు, అపొస్తురు. దనిజ్ మూల పణుకు క్రీస్తుయేసునె.

21 వాండ్రె ఆ ఇల్లు అర్‌ఎండ అన్నికాన్. వన్ని వెటనె ఆ ఇల్లు తొహె ఆజి పిరిసి ప్రబు ఆతి యేసు క్రీస్తు మండ్రెజ్ వన్ని వందిజ్ కేట ఆతి నెగ్గి ఇల్లు ఆనాద్.

22 క్రీస్తు వెట కూడితి మని మిజి వాండ్రు మహి నమ్మిత్తి వరివెట కుడుప్పినాన్. అయావలె మీరు మహి నమ్మిత్తి వరివెట, దేవుణు వన్ని ఆత్మ సత్తుదాన్ మంజిని ఉండ్రె ఇల్లు ఆజినిదెర్.

3

యూదురు ఆఇ వరిజ్ సువార్త వెప్పొ పణి పవులుజ్ దేవుణు ఒపజెప్పినాన్

1 అందెజె క్రీస్తు యేసుజ్ సేవ కిని వందిజ్ జెలిదు మని పవులు ఇని నాను మీ వందిజ్ పార్దనం కిజిన. యూదురు ఆఇ మిజి సువార్త వెప్పొని వందిజె నాను జెలిదు ఆత.

2 మీరు తప్‌ఎండ వెహిమనిదెర్. దేవుణు దయ దర్భమ్‌దాన్, మిజి సువార్త వెప్పొ పణి నజి ఒపజెప్తాన్

3-4 దేవుణు ఎత్తు కిజి వన్ని గర్భమ్‌దు డాప్తి ఇట్టిక వాండ్రు నా వెట తొరిస్తాన్. దిని వందిజ్ నాను ముస్కు కండెక్ రాస్త మన. అయాక మీరు సద్‌వెతిజు, క్రీస్తు వందిజ్ దేవుణు ఎత్తు కిజి గర్భమ్‌దు డాప్తి ఇట్టిక నాను నెస్త మన ఇజి మీరు నెస్సిదెర్.

5 యాక దేవుణు ఘోరబమ్దు మహి లోకురిజ్ తోరిసి నెన్పిన్వెతాన్. గాని ఏలు వన్ని వందిజ్ ఏర్పాటు కిత్తి అపొస్తుడురిజ్, ప్రవక్తరిజ్ తోరిసి నెన్పిస్తాన్. దేవుణు ఆత్మదాన్నే ఈహు తోరిసి నెన్పిస్తాన్.

6 దేవుణు ఎత్తు కిజి గర్బమ్దు డాప్పి ఇట్టిక ఇనిక ఇహిజు, యూదురు ఆఇ వరిజ్, యూదురు ఆతి వరివెట దేవుణు సీని దీవెనమ్కాజ్ అక్కు మనాద్. యూదురు ఆఇకార్ని, యూదురు ఉండ్రె ఒడోల్ ఆత మనార్. దేవుణు క్రీస్తు యేసు వెట యూదురిజ్ కిత్తి ఒట్టుదిజ్, యూదురు ఆఇ వరిజ్బా వంతు మనాద్. యాకెజ్ మీరు సువార్త నమ్మిత్తిజ్నే దోహ్కె.

7 యా సువార్తనె నాను లోకురిజ్ వెప్పిన. యా సువార్త పణినె దేవుణు వన్ని దయ దర్మమ్దాన్ నజి ఒపజెప్తాన్. వన్ని సత్తు సీజి నా వెట కిబిసినాన్.

8 దేవుణు లోకుర్ లొఇ నాను ఎందనిజ్ పణిదిజ్ రెఇకాన్. గాని వాండ్రు నజి యా పెరి పణి ఒపజెప్తాన్. ఇహిజు, క్రీస్తు సీజిని అంతు సిలి దీవెనమ్క వందిజ్ యూదురు ఆఇ వరిజ్ వెహ్తాజ్,

9 మరి దేవుణు ఎత్తు కిజి గర్బమ్దు డాప్పి ఇట్టిక ఎలాగ వాండ్రు కినాన్ ఇజి లోకుర్ విజెరిజ్ నెస్పిస్తాజ్ వాండ్రు యా పణి నజి ఒపజెప్తాన్. విజు తయార్ కితి దేవుణు ఘోరబమ్దాన్ అసి వాండ్రు ఎత్తు కిజి గర్బమ్దు ఇట్టిక లోకురిజ్ డాప్తాన్.

10 వాండ్రు ఎందనిజ్ యా లెకెండ్ డాప్తాన్ ఇహిజు, పరలోకమ్దు మని దూతారిజ్, వన్కా అతికారిజు, వాండ్రు గొప్ప గెణం మనికాన్ ఇజి దేవుణు సజం వెట ఏలు తోరిస్తాజ్ యాక వన్ని లోకుర్ వందిజ్ వాండ్రు ఆతి దనితాన్నే తోరిసినాన్.

11 లోకం పుటిన్వెండ ముజాలె, యా లెకెండ్ కిదెజ్ ఇజి దేవుణు ఎత్తు కిత మహాన్. అయాలెకెండ్ మా ప్రబు ఆతి క్రీస్తు యేసు వెట కిత్తాన్

12 మాటు వన్నిజ్ నమ్మిజనాట్. వన్ని వెట కూడిత మనాట్. అందెజె తియెల్ సిల్లెండ దయ్ రమ్దాన్ దేవుణు డగ్రు సొన్ని లొస్తాజ్

అక్కు దోహ్క మనాద్.

13 అందెజె మా వందిజె వన్నిజ్ స్రమెజ్ వాతె ఇజి నా వందిజ్ విసారిస్మాట్ ఇజి నాను మిజి బతిమాల్జిన. గాని యా స్రమెజాణిజ్ మిజి గవరం సీనార్.

పవులు ఎపెసుదు మని నమ్మిత్తి వరి వందిజ్ పార్దనం కిజినాన్

14 దినివందిజె, నాను మా బుబ్బు ఆతి దేవుణు ఎద్రు ముణుకుజ్ ఊర్జి మీ వందిజ్ పార్దనం కిజిన.

15 పరలోకమ్దు మని నమ్మిత్తి విజెరిజ్, యా లోకమ్దు మని నమ్మిత్తి విజెరిజ్ వీంద్రె బుబ్బు. విజెరె వన్ని కుటుమ్దికార్.

16 వన్ని లోకుర్ వందిజ్ ఇట్టి మని నండొ దివెనమ్కాణిజ్, మీ మన్ను దయ్ రమ్దాన్ నెగ్రెండ మండ్రెజ్ వన్ని ఆత్మ వెట సత్తు సీదెజ్ ఇజి నాను వన్నిజ్ పార్దనం కిజిన.

17 మీరు క్రీస్తుజ్ నమ్మిజినిదెర్. అందెజె వాండ్రు మీ మన్నుదు ఎలాకాలం మండ్రెజ్ ఇజి నాను పార్దనం కిజిన. మీరు దేవుణుదిజ్ ప్రేమిసి మహి వరిజ్ ప్రేమిసి మండ్రెజ్ ఇజి నాను పార్దనం కిజిన. అయ లెకెండ కిజి మహిజ, బూమి లొఇ సారితి సొహి వెల్లెజ్ మని మరాన్ లెకెండ మీరు మనిదెర్. నెగ్గి పునాది మున్ను తొవ్కీ మని ఇల్లు లెకెండ మనిదెర్.

18 అయావలె క్రీస్తు మజి ఎసొ ప్రేమిసినాన్ ఇజి మీరు, దేవుణు వందిజ్ కేట ఆతి లోకుర్ విజెరె వెట పూర్తి నెస్తెజ్ అట్టిదెర్. వాండ్రు మజి అంతు సిల్లెండ నండొ ప్రేమిసినాన్.

19 ఎయెర్బా అర్దం కిదెజ్ అట్ఇ క్రీస్తు ప్రేమ మీరు నెనిసె మండ్రెజ్ ఇజి నాను పార్దనం కిజిన. దేవుణుదిజ్ మని పూర్తి బుద్ధి మిజిబా మంజిని వందిజె నాను ఈహు పార్దనం కిజిన.

20 మాటు లొస్సి విజు దని ఇంక, ఒడిబిని దనిజ్ నండొ కిదెజ్ దేవుణు అట్నాన్. మా లొఇ పణి కిజిని వన్ని ఆత్మ సత్తుదాన్ నె వాండ్రు కిజినాన్.

21 క్రీస్తు యేసు వెట వాండ్రు కితి గొప్పు పణి వందిజ్, దేవుణు సజం వెట వాండ్రు కితి గొప్పు పణి వందిజ్ యా దేవుణుదిజ్ తర తరమ్కు పొగిడిఃజి మంజినాట్. వన్నిజ్ ఎలాకాలం పొగిడిఃజినాట్. ఆమెన్.

4

క్రీస్తు వెట ఉండ్రె ఒడొల్ ఆతాట్

1 అందెజె ప్రబుజ్ సేవ కిజిని వందిజ్ జెలిదు ఆతి నాను మిజి బతిమాలిజిన. దేవుణు మిజి నా లోకు ఇజి కూక్తివలె నెగ్గి సరిదు నడిఃదెజ్ ఇజి కూక్తాన్. దనిజ్ తగ్గి వజ మీరు మండ్రెజ్ ఇజి నాను మిజి బతిమాలిజిన.

2 ఎస్తివలెబా గర్ర ఆవండ తగిజి మండ్రు. మహి వరివెట సార్లిదాన్ మండ్రు. మహి వరిజ్ ప్రేమిసి, వరి వందిజ్ ఓరిసి మండ్రు.

3 దేవుణు ఆత్మనె మిజి కుడుప్త మనాన్. అందెజె మీరు ఉండ్రె ఆజి మంజిని వందిజ్ సమాదనమ్దాన్ కూడఃజి పాడఃజి మండ్రెజ్ నండొ సుడఃదెజ్ వలె.

4 మాటు ఉండ్రె ఒడొల్. ఉండ్రె దేవుణు ఆత్మ మజి దొహ్క మనాన్. దేవుణు మజి వన్ని లోకుర్ ఇజి కూక్తివలె, వాండ్రు సీన ఇజి ఒట్టు కితి ఉండ్రె నని దీవనమ్క వందిజ్ మాటు విజెట ఆసదాన్ ఎద్రు సుడఃజినాట్.

5 మజి విజెరిజ్ ఒరెండ్రె ప్రబు. మాటు నమ్మిజిని బోద ఉండ్రె. మాటు ఉండ్రె బాప్తినం లాగె ఆతాట్.

6 మాటు ఒరెండ్రె దేవుణుదిజ్ మాడిఃస్సాట్. వాండ్రె విజెరిజ్ బుబ్బు. వాండ్రె విజెరి ముస్కు అతికారం కినికాన్. వాండ్రె మా లోఇ మంజినాన్. మా వెట పణి కిబిసినాన్.

7 గాని మా లోఇ ఒరెన్ ఒరెన్ వన్నిజ్ ఉండ్రె ఉండ్రె వరం, క్రీస్తు మజి సితాన్. అయాక వన్నిజ్ ఇస్టం ఆతి వజ వాండ్రు సీబాత సితాన్.

8 అందెజె దేవుణు మాటదు రాస్త మనాద్, “వాండ్రు ఎత్తు మని బాన్ ఎక్కి సొహివలె, వాండ్రు ఉద్దం గెలస్తివలె, అస్తి వరిజ్ వన్నివెట తొహ్క ఒతాన్. వాండ్రు లోకురిజ్ ఇనాయమ్కు సీబాత సితాన్”, ఇజి.

9 (వాండ్రు 'ఎక్త సొహాన్', ఇజి వెహ్నిని దనిజ్ అర్దం ఇనిక? దని అర్దం ఇనిక ఇహిజ, వాండ్రు ముజాల, అడిఃగి మని యా బూమిదు వాతాన్.

10 యా బూమి ముస్కు డిగితి వాతికాండ్రె అగాసం డాట్టి ముస్కు. నండో అతికారం మని బాన్ ఎక్కి సొహికాన్. యా బూలోకమ్దు మని విజు వన్కాజ్ వన్ని వెట పూర్తి కిదెజె వాండ్రు ముస్కు ఎక్త సొహాన్)

11 వాండ్రె, లోకురిజ్ ఒరెన్ ఒరెన్ వన్నిజ్ ఉండ్రీ ఉండ్రీ వరం ఒపజెప్తాన్. సెగొండారిజ్ అపొస్తురు ఇజి సెగొండారిజ్ ప్రవక్తరు ఇజి, సెగొండారిజ్ సువార్త వెహ్నికార్ ఇజి, సెగొండారిజ్ దేవుణు సజం సుండఃజి, నెస్పిసి, వరిజ్ నెగ్రెండ నడిఃపిస్సి పాస్టరుజు ఇజి వాండ్రు ఏర్పాటు కిత్తాన్.

12-13 ఎందనిజ్ ఇహిజ, దేవుణు లోకురిజ్ దేవుణు పణి కిదెజ్ పూర్తి నెన్పిస్తెజె యా లెకెండ్ ఏర్పాటు కిత్తాన్. క్రీస్తు ఒడొల్ అతి దేవుణు సజమ్దికార్ దేవుణుదిజ్ నెసి పూర్తి పిరిని వందిజె దేవుణు లోకుర్ దేవుణు పణి కిదెజ్. అయా లెకెండ్ మాటు దేవుణుదిజ్ నమ్మిజి, వన్ని మరిసిజ్ నెసి ఉండ్రె ఆజి మంజినాట్. మాటు పూర్తి బుద్ధి వాతి వరి లెకెండ్ పిరినాట్ ఇహిజ క్రీస్తు లెకెండ్ పూర్తి ఆనాట్.

14 అయావలె మాటు కొడొల్ లెకెండ్ మన్ఎట్. గాలి డెయిజి, ఉల్కెజ్ ఇతల్ అతాల్ దూక్కిని డోణి లెకెండ్, అబద బోద నెస్పిస్సి మొసెం కిని వరి బాణిజ్ మొసెం ఆఎట్.

15 గాని మాటు ఎస్తివలెబా నిజం వెహ్ని ప్రేమిసి మండ్రెజ్. అయాలెకెండ్ మాటు కిజిని విజు వన్కా లోఇ, క్రీస్తు లెకెండ్ పూర్తి ఆనాట్. వాండ్రె మా బుర్త లెకెండ్.

16 మాటు వన్ని ఒడొల్. ఒడొల్దు ఒడొల్ది అత్కుజ్ అత్కిస్తి లెకెండ్ క్రీస్తు మజీ అత్కిస్తాన్. ఒడొల్ది అత్కుజ్ విజు అయాకెజ్ పణి కిదెజ్ మని లెకెండ్ పణి కితిజ, ఒడొల్ సత్తుదాన్ పిపినాద్. అయాలెకెండ్ దేవుణు సజమ్దికార్ ఒరెన్ మరి ఒరెన్ వన్నిజ్ ప్రేమిసి వారు కిదెజ్ మనికెజ్ కితిజనె దేవుణు సజం సత్తుదాన్ పిపినాద్.

17 అందెజె ప్రబు నజీ సీతి అతికారమ్దాన్ నాను మిజి వెహ్నిన.

నాను డటమ్ నె మిజి వెహ్సిన. ఏలుదాన్ దేవుణుదిజ్ నెన్ ఇకార్ కిజిని లెకెండ్ మీరు మన్ మాట్. వారు పణిదిజ్ రెకెజ్ ఒడోబినార్

18 వరి మన్నుదు సీకాట్ మని లెకెండ్ మనార్. దేవుణు సీజిని కొత్త బత్తుదిజ్ దూరం మనార్. ఎందనిజ్ ఇహిజ, దేవుణు వందిజ్ నిజమాతికెజ్ వారు అర్థం కిఎర్. వరి మన్ను గటిదిక.

19 వరిజ్ సిగు సాహద్. వారు ఒడోల్ ది సెజ ఆసెజ ఒజ ఆతార్. విజు రకమ్ కాణి పాపమ్ కు కిజినార్. వారు అయాకెజ్ డిస్ ఎర్. మరి మరి కిదెజె ఆస ఆజినార్.

20 గాని మీరు క్రిస్తు వందిజ్ నెస్తివలె అయాలెకెండ్ మండ్రెజ్ అఎద్ ఇజి నెస్తిదెర్.

21 నిజమ్ నె, మీరు వన్ని వందిజ్ వెహిదెర్. మీరు వన్ని వెట కూడితివలె యేసు వందిజ్ నిజమాతి దనిజ్ తగ్గివజ మిజి దేవుణు ఆత్మ నెస్తిస్త మనాన్.

22 మీరు బత్తిజి మహి పడాః ఇ బత్తు డిఃస్తు ఇజినె నెస్తిస్తాన్. పడాః ఇ బత్తుదు, మిజి మహి సెజ ఆసెజ్ మిజి మొసెం కిజి పాడు కిజినె మహె.

23 మీ బుద్ధిని మీ మన్ను దేవుణు మారిస్తెజ్ వలె.

24 దేవుణు మిజి వన్ని నని బుద్ధి సితాన్. అందెజె వాండ్రు సీతి ఆ కొత్త బుద్ధిదాన్ మీరు మండ్రు. అయావలె నీతి నిజాయితీదాన్ మంజినిదెర్. తప్పజ్ కిఎండ మంజినిదెర్.

25 అందెజె ఏలుదాన్ అబద్దం వర్గిమాట్. మహి వరి వెట నిజం వర్గిదెజ్ వలె. ఎందనిజ్ ఇహిజ మాటు ఉండ్రె ఒడోల్ దిజ్ సెందితికాట్.

26 మీరు కోపం ఆతిజ, మీ కోపం మిజి పాపం కిబిన్ ఎండ సుండోదెజ్. మీ కోపం వెడారు మండ్రెజ్ అఎద్.

27 తప్ప కిబిస్తెజ్ సయితాన్ దిజ్ సరి సీమాట్.

28 డోజి కిజి మహికాన్ ఏలుదాన్ డోజి కిదెజ్ అఎద్. గాని వాండ్రు వన్ని కికాణిజ్ కన్బుడిజి వన్నిజ్ పణిదిజ్ వానికెజ్ కిదెజ్. ఎందనిజ్ ఇహిజ, అయావలె వాండ్రు బీదవరిజ్ సాయం కిదెజ్ అట్నాన్.

29 మీ వెయ్ దాన్ సెజ మాటెజ్ వాదెజ్ అఎద్. గాని మహికార్

నమకమ్దు పిరిదెజ్ తగ్గి నెగ్గి మాటెజె వర్గిదెజ్. లోకురిజ్ వరి అవుసరం సుడఃజి వర్గిదెజ్. ఎందనిజ్ ఇహిజ అయావలె మీ మాటెజ్ వెని వరిజ్ లాబం మంజినాద్.

30 దేవుణు అత్మదిజ్ దుకం కిబిస్మాట్. ఎందనిజ్ ఇహిజ, దేవుణు మిజి పూర్తి విడుఃదల కిని దినమ్దాక మీరు వన్ని లోకుర్ ఇని దనిజ్ గుర్తు యా దేవుణు ఆత్మనె.

31 మీ లొఇ మని కుత అస్సిక, కోపం, పగ అస్సిక, జటిజ్ ఆనిక, దుసలాడఃనిక, మహి వరిజ్ సెఇకెజ్ కిఇ బుద్ది, మీ లొఇహాన్ డిఃస్తు.

32 గాని మహి వరి వందిజ్ నెగ్గికెజ్ కిదు. వరిజ్ కనికారం తోరిస్తు. మిజి కితి సెఇ దని వందిజ్ సెమిస్తు. క్రిస్తు వెట దేవుణు మీ తప్పుజ సెమిస్తి లెకెండ్, మీరు వరిజ్ సెమిస్తు.

5

1 అందెజె మీరు దేవుణుదిజ్ పోలిజి మండ్రు. ఎందనిజ్ ఇహిజ, వాండ్రు నండొ ప్రేమిస్సి వన్ని కొడొఃరె మీరు.

2 క్రిస్తు మిజి ప్రేమిస్తాండ్రె, మా వందిజ్ సాదెజ్ వన్నిజ్ వాండ్రె ఒపజెవె ఆతాన్. వాండ్రు వన్ని పాణం నెగ్గి వాసనం సీని పూజ లెకెండ్ సితాన్. దనివెట దేవుణు సర్ద ఆతాన్. అయావజ మీరుబా ఒరెన్ మరి ఒరెన్ వన్నిజ్ ప్రేమిసి మండ్రు.

3 మీ లొఇ ఎయెన్బా రంకు బూలమాట్. కెలార్ బూలమాట్. మని దనిజ్ ఇంక మరి నండొ కావాలి ఇజి ఆస ఆమాట్. నిని పణి మీ లొఇ మంజినె ఇజి మహికార్ వెహ్లాజ్బా సరి సీదెజ్ ఆఎద్. ఎందనిజ్ ఇహిజ, మీరు దేవుణు లోకుర్.

4 గాని మీ లొఇ కేడి మాటనొ, బుద్ది సిలి మాటనొ వెంజి, సిగు ఆని మాటెజ్నొ వర్గిదెజ్ ఆఎద్. అయాకెజ్ మిజి తగ్గె. గాని దేవుణుదిజ్ వందనమ్కు మీరు వెహ్లాజ్.

5 యాక మీరు తప్వెండ నెస్తు రంకు బూలానికాన్, కెలార్ బూలానికాన్, మని దనిజ్ ఇంక మరి నండొ కావాలి ఇజి ఆస ఆనికాన్ ఎయెన్బా దేవుణుని క్రిస్తు ఏలుబడిః కిని లోకుర్ లొఇ మన్ఎర్. అబె అక్కు మనికార్ ఆఎర్. మని దని ఇంక మరి నండొ కావాలి ఇజి ఆస

అనికాన్, బొమెజు మాడిఃస్ని వన్నిలెకెండ్ మనాన్. వాండ్రు వన్నిజ్ కావాలి ఇజి అస ఆని దనిజె దేవుణు ఇజి ఒడిఃబినాన్.

6 పణిదిజ్ రెఱ మాటెజ్ వెప్పి ఎయెన్బా మిజి మొసెం కిఎండ సుండఃదు. ఎందనిజ్ ఇహిజు, సెఇకెజ్ కిజి దేవుణుదిజ్ లొజిఎండ మని వరిజ్ వాండ్రు సిక్కు సీనాన్.

7 అందెజె నని వరి వెట జత కూడాట్.

8 ఎందనిజ్ ఇహిజు, ఉండ్రీ కాలమ్దు మీరు సీకటుదు బత్కితిదెర్. గాని ఏలు మీరు ప్రబు వెట కూడితిదెరె జాయిదు బత్కిజినిదెర్. అందెజె జాయిదు బత్కిజిని వరిలెకెండ్ బత్కిదు.

9 ఎందనిజ్ ఇహిజు జాయిదు బత్కిజినికార్, ఎస్తివలెబా నెగ్గికెజ్, నీతి మనికెజ్, నిజమాతికెజ్ కిజి మంజినార్.

10 ప్రబుజ్ ఇనికెజ్ ఇస్టం ఇజి నెసి అయావజు కిదెజ్ సుండఃదు.

11 సీకటుదు మనికార్ కిని పణిదిజ్ రెఱ పణిజు వెట కూడాట్. గాని అయాకెజ్ సెఇకెజ్ ఇజి లోకురిజ్ వెప్తు.

12 వారు సడి సిల్లెండ కిజిని పణిజు వందిజ్ వెప్తాజ్బా సిగునె.

13 గాని విజు వన్నాజ్ జాయి వెల్లి తపిస్సివలె అయాకెజ్ ఇనికెజ్ ఇజి లోకుర్ నెస్సార్. ఎందనిజ్ ఇహిజు, జాయి నిజమాతికెజె వెల్లి తోర్నాద్.

14 అందెజె వెప్పి మంజినార్, “నిద్ర కిజినికి తెలి ఆఅ. సాతి వరిబాణిజ్ నిజ్అ. క్రీస్తు నిజి జాయి సీనాన్”, ఇజి.

15 అందెజె మీరు ఎలాగ నడిఃజినిదెర్ ఇజి జాగర్తు సుండఃదు. బుద్ది సిలివరి లెకెండ్ ఆవండ, బుద్ది మని వరిలెకెండ్ నడిఃదు.

16 కాలం గడాప్మాట్. ఎందనిజ్ ఇహిజు ఏలు నెగ్గి దనిమ్కు ఆఉ.

17 అందెజె బుద్ది సిలిలెకెండ్ బత్కిమాట్. గాని ప్రబుజ్ ఇనికెజ్ ఇస్టం ఇజి నెసి అయాకెజ్ కిదు.

18 మతు సీనికెజ్ ఉణిజి సొసి మన్మాట్. ఎందనిజ్ ఇహిజు అయాక పాడు కినాద్. గాని దేవుణు ఆత్మదాన్ నిండ్రీజు మండ్రు.

19 మీరు ఒరెన్ మరి ఒరెన్ వన్ని వెట వర్గిని వలె దేవుణు మాటెజ్ పాటెజ్ వజు వెప్పి, దేవుణుదిజ్ పొగిడిఃజి వందనమ్కు వెప్పి,

దేవుణు ఆత్మ మీ మన్నుదిజ్ రేప్పిని వజ పాటెజ్ వెప్పిని వర్గిదు. మీ మన్ను పూర్తిదాన్ ప్రబు ఆతి దేవుణుదిజ్ పాటెజ్ పార్దు.

20 మా ప్రబు ఆతి యేసు క్రీస్తు వెట మజి దోహ్కొక్తి మని విజు దని వందిజ్ ఎస్తివలెబా మా బుబ్బు ఆతి దేవుణుదిజ్ వందనమ్కు వెప్తు.

దేవుణు సజమ్దిజ్ క్రీస్తు మాసి

21 క్రీస్తుజ్ మీరు గవరం సీజినిదెర్. అందెజె ఒరెన్ మరి ఒరెన్వన్నిజ్ లోజిదు.

22 బోదెకాండె, మీరు ప్రబుజ్ లోజిజిని వజ మీ మాసిరిజ్ లోజిదు. మాసిరు మీ మున్ను అతికారం మనికార్ ఇజి ఒడోబిజి వరిజ్ లోజిదు.

23 ఎందనిజ్ ఇహిజు క్రీస్తు, విజు దేవుణు సజమ్కాజ్ బుర్ర ఆతి లెకెండె, మాసి వన్ని బోదెల్దిజ్ బుర్ర ఆత మనాన్. దేవుణు సజమ్కు విజు క్రీస్తు ఒడోల్నె. వాండ్రె విజు దేవుణు సజమ్కాజ్ రక్కిన్నికాన్.

24 విజు దేవుణు సజమ్కు క్రీస్తుజ్ లోజిజిని వజ, బోదెకుబా వన్నా మాసిరిజ్ విజు వన్నా లోఇ లోజిదెజ్.

25 మొగ్గ కొడోరాండె, మీరు మీ బోదెకాజ్ ప్రేమిస్తు. క్రీస్తు విజు దేవుణు సజమ్కాజ్ ప్రేమిసి విజు సజమ్క వందిజ్ సాతిలెకెండె మీరు మీ బోదెకాజ్ ప్రేమిస్తు.

26-27 క్రీస్తు ఎందనిజ్ విజు దేవుణు సజమ్కాజ్ వందిజ్ సాతాన్ ఇహిజు, విజు దేవుణు సజమ్కు సుబ్బురమ్దాన్ మండ్రెజ్ ఇజినె. వాండ్రు దేవుణు మాటదాన్, బాప్తిసమ్దాన్ సజమ్కాజ్ సుబారం కిత్తాన్. మరి సజమ్కు ఇని పాపం సిల్లెండ, నిందెజ్ సిల్లెండ, తకుబ సిల్లెండ, ఇని సెఇకెజ్ సిల్లెండ వన్ని ఎద్రు వాండ్రె నెగ్రెండ తోరిస్తెజె విజు దేవుణు సజమ్క వందిజ్ వాండ్రు సాతాన్.

28 అయలెకెండెనె క్రీస్తు విజు దేవుణు సజమ్కాజ్ ప్రేమిసినాన్. అయలెకెండెనె ఒరెన్ మాసి ఆల్నిజ్ ప్రేమిస్తెజ్. ముకెలం మాసిరు వరి సాంత ఒడోల్దిజ్ ప్రేమిన్ని లెకెండె, వరి బోదెకాజ్ ప్రేమిస్తెజ్ వలె. వన్ని బోదెల్దిజ్ ప్రేమిన్నికాన్ వన్నిజ్ వాండ్రె ప్రేమిస్తాన్.

29-30 ఎందనిజ్ ఇహిజు ఎయెన్బా వన్ని సొంత ఒడొల్దిజ్ దూసిన్ఎన్. గాని దనిజ్ నెగ్రెండ సుడొజి పొస కినాన్. మాటు క్రీస్తు ఒడొల్దు అత్తిత మనాట్. అందెజె క్రీస్తు వన్ని ఒడొల్ ఆతి విజు దేవుణు సజమ్కాజ్ నెగ్రెండ సుడొజినాన్.

31 యాక దేవుణు మాటదు రాస్తి మని లెకెండ మనాద్. అందెజె, “మొగకొడొ: వన్ని అయిసి అప్పొసిరుజ్ డిసి వన్ని బోదెల్ వెట కూడొనాన్. వారు రిఎర్ ఉండ్రె ఒడొల్ ఆనార్”.

32 యా మాటదిజ్ నండొ నిరీ అర్దం మనాద్. గాని యా మాటెజ్ క్రీస్తు వెట విజు దేవుణు సజమ్కాజ్ మని సమదం వందిజ్ వెప్పొనికెజ్ ఇజి నాను ఒడొబిజిన.

33 గాని యా మాటెజ్ మీ వందిజ్బా మనికాదె. ఒరెన్, వన్నిజ్ వాండ్రె ప్రేమిన్ని లెకెండ, వాండ్రు వన్ని బోదెల్దిజ్బా ప్రేమిస్తెజ్ వలె. మరి బోదెల్ మాసిజ్ గవరం సిదెజ్ వలె.

6

కొడొరిజ్, అయిసి అప్పొసిరిజ్ వెప్పొనిక

1 కొడొరాండె, మీరు ప్రబు వెట కూడితి మనికిదెర్. అందెజె మీ అయిసి అప్పొసిరిజ్ లొజిదు. యాక కిదెజ్ తగ్గికాదె.

2-3 దేవుణు మాటదు రాస్త మనాద్, “మీ అయిసి అప్పొసిరిజ్ గవరం సిదు. యాకదె దేవుణు వెప్తి ఆడ్రెజు లొఇ ఒట్టుదాన్ కూడితి మని మొదొహి ఆడ్ర. అయా ఒట్టు ఇనిక ఇహిజు, ‘మీరు మీ అయిసి అప్పొసిరిజ్ లొజితిజు విజు మిజి నెగ్రెండ మంజినె. మీరు నండొ పంటెజ్ యా బూమిదు బత్తినిదెర్’.

4 అప్పొసిరాండె, మీరు మీ కొడొర్ మన్నుదిజ్ కోపం రేప్మాట్. గాని ప్రబుజ్ ఇస్తం ఆతి వజు, వరిజ్ బుద్ది వెప్పొ, నెస్పిసి పొస కిదు.

వెట్టిపణి కిని వరిజ్ ఎజమానిరిజ్ వెప్పొనిక

5 వెట్టిపణి కినికిదెరా, బూమి ముస్కు మని మీ ఎజుమానిరిజ్ లోజిదు. మీరు క్రీస్తుజ్ లోజిజిని లెకెండ్ వరిజ్ లోజిదు. మీరు పూర్తి మన్సుదాన్ వరిజ్ తియెల్ ఆజి వరిజ్ సీని గవరం సీజి లోజిదు.

6 నెగ్గికార్ ఇజి వెహె ఆదెజ్ వారు నూణివలెనె ఆఎద్. వరిజ్ లోజిదెజ్. గాని మీరు కిదెజ్ ఇజి దేవుణు కోరిజిన వజ మీ పూర్తి మన్సుదాన్ కిదు. ఎందనిజ్ ఇహిజు మీరు క్రీస్తుజ్ వెట్టి పణిమణిసీర్.

7 మీరు పణిజ్ కిని వలె, లోకుర్ వందిజె కిజినావ్ ఇజి ఆఎండ, దేవుణు వందిజ్ కిజినావ్ ఇజి సర్దదాన్ కిదు.

8 ఎందనిజ్ ఇహిజు వెట్టిపణి కినికాన్ ఆతిజ్బా, మరి ఎయెన్ ఆతిజ్బా మరి ఇని నెగ్గి పణి కినికాన్ ఆతిజ్బ ప్రబు పలితం సీనాన్ ఇజి మీరు నెసినిదెర్.

9 ఎజమానురుజాండె, మీరుబా మీ వెట్టిపణి మణిసిరిజ్ నెగ్రెండ సుండెదు. వరిజ్ బెద్రిస్మాట్. ఎందనిజ్ ఇహిజు మీరు నెస్సిదెర్, మిజిని వరిజ్ ఒరెన్ ఎజమాని దేవుణు మంజిని బాడిెదు మనాన్. ఇజ్రికాన్ పెరికాన్ ఇజి వన్నిజ్ తెడ సిల్లెద్.

సయ్తానుజ్ ఎద్రిస్సిక ఎలాగ ఇజి వెహినాన్

10 కడెవెరిదు నాను మిజి వెహిన, ప్రబు వెట మీరు కూడెజి వన్ని సత్తుదాన్ మండ్రు. ఎందనిజ్ ఇహిజు వన్ని సత్తు గొప్ప పెరిక.

11 దేవుణు సీజిని విజు అయుదమ్కు తొడిగిజి తయార్ ఆజి మండ్రు. సయ్తాను అడ్డుజు ఎద్రిసి గెలస్సివందిజ్ యా లెకెండ్ తొడిగిజి తయార్ ఆజి మండ్రు.

12 ఎందనిజ్ ఇహిజు, మాటు లోకుర్ వెట ఆఎద్ ఎద్రిస్సిక. గాని సీకటుదు మని లోకుర్ ముస్కు అతికారం కిజిని దెయమ్క వెట, వన్కా నెయ్కిర్ వెట, ఆగాసమ్దు మని విజు దెయమ్కాజ్నె మాటు ఎద్రిసినాట్.

13 అందెజె మీరు దేవుణు సీజిని విజు అయుదమ్కు తొడిగిజి సయ్తానుజ్ ఎద్రిస్సెజ్ తయార్ ఆజి మండ్రు. నెఇ దినమ్కు వానివలె,

దయిరమ్దాన్ నిల్దెజ్ అట్టిదెర్. ఆకర్ దాక, మీరు దయిరమ్దాన్ నిల్నిదెర్.

14 అందెజె మీరు దయిరమ్దాన్ నిల్దెజ్ తయార్ ఆజి మండ్రు. ఒరెన్ విదెం కినికాన్ నడుముదు బెల్లు తొహె ఆజి విదెమ్దిజ్ తయార్ ఆజిని లెకెండ్, దేవుణు వందిజ్ నిజమాతికెజ్ నమ్మిజి తయార్ ఆజి మండ్రు. గుండెదు కాడెండ్ మంజిని వందిజ్ ఇనుము కవసం తొడిగిజిని లెకెండ్ దేవుణు ఎద్రు నీతి నిజాయితిదాన్ మంజి, సయ్తాన్ బాణిజ్ తప్రె ఆదు.

15 జార్ఎండ్ నెగ్రెండ్ నిల్ని వందిజ్ బూట్కు తొడిగిని లెకెండ్ సమాదనం సీజిని సువార్త మాట నమ్మిజి, సయ్తానుజ్ ఎద్రిసి నెగ్రెండ్ నిల్దు.

16 యాకెజె ఆవండ్, ఒరెన్ ఉద్దం కినికాన్, వన్నిజ్ పడెఃఇకాన్ వన్ని మున్కు పొక్కిని సిసు బాణమ్కు డాలు అసి నప్పి ఎద్రిన్ని లెకెండ్, సయ్తాను బాణిజ్ తప్రె ఆదెజ్ ఎస్తివలెబా యేసు క్రీస్తు మున్కు నమకం ఇడజినె మండ్రు.

17 బుర్దు దెబ తగ్గెండ్ మంజిని వందిజ్ గొప్ప గటి మని టోపి తొడిగిని లెకెండ్ దేవుణు మిజి రక్కిన్త మనాన్ ఇజి నెసి నమ్మిజి సయ్తాన్ మిజి బాదెజ్ కిఎండ్ వన్ని బాణిజ్ దూరం మండ్రు. కీదు కూడం అసి తయార్ ఆతి లెకెండ్, దేవుణు మాటదాన్ సయ్తానుజ్ ఎద్రిన్జెజ్ తయార్దాన్ మండ్రు. దేవుణు ఆత్మ మిజి సీజిని కూడెమ్నె దేవుణు మాట.

18 దేవుణు ఆత్మ మన్కుదు వెహ్సి నడిఃపిన్సి లెకెండ్ ఎస్తివలెబా పార్దనం కిదు. దేవుణు బాణిజ్ సాయం లొస్తు. మీరు ఎస్తివలెబా పార్దనం కినివలె బదకమ్దాన్ పార్దనం కిమాట్. పార్దనం డిఃస్మాట్. దేవుణు వందిజ్ కేట ఆతి లోకుర్ విజెరె వందిజ్ ఎస్తివలెబా పార్దనం కిదు.

19 నా వందిజ్బా పార్దనం కిదు. నాను వర్గిని వలె నెగ్గి మాట నా వెయిదు దేవుణు సీని లెకెండ్, ఎందనిజ్ ఇహిజ, సువార్తదు ముజాలె డాఃజితి మహి. గాని ఏలు దేవుణు తోరిసి నెన్పిన్సి గొప్ప సజతిజ్ వెల్లి

తన దయిరమ్దాన్ లోకురిజ్ తోరిస్తాజ్.

20 యా సువార్త వెహ్తాజ్, వన్ని కబ్బు తనివన్ని లెకెండ్ యేసుక్రీస్తు నజీ ఏర్పాటు కిత్తాన్. దిని వందిజె ఏలు నాను జెలిదు మన. అందెజె నాను నెగ్రెండ దయిరమ్దాన్ వెహ్తాజ్, మని లెకెండ్ వెహ్తాజ్ నా వందిజ్ పార్దనం కిదు.

21 మాటు ప్రేమ కిజిని మా తంబెరి ఆతి తుకికు, నా వందిజ్ మిజీ విజు వెహ్తాన్. నాను ఇనిక కిజిన, ఎలాగ మన ఇజి మీరు నెస్తాజ్ నా వందిజ్ వాండ్రు వెహ్తాన్. వాండ్రు ప్రబు వందిజ్ నమ్మకమ్దాన్ సేవ పణి కిజినికాన్.

22 మజీ జర్గిజిని దని వందిజ్ మిజీ వెహ్తాజ్, మిజీ దయిరం మాట వెహ్తాజ్ ఓదరిస్తాజ్, దిని వందిజె నాను వినిజ్ మీ డగ్రు పోక్కిన.

23 మా బుబ్బు ఆతి దేవుణుని మా ప్రబు ఆతి యేసు క్రీస్తు, తంబెరిజు ఆతి మీరు విజెరె, నిపాతిదాన్ మండ్రెజ్ సాయం కిపిన్. మీరు మహి వరిజ్ ప్రేమిసి మండ్రెజ్ క్రీస్తుజ్ నమ్మిజినె మండ్రెజ్ సాయం కిపిన్.

24 కొస సిల్లెండ, మా ప్రబు ఆతి యేసు క్రీస్తుజ్ ప్రేమిస్సి విజెరిజ్ దేవుణు దయ దర్మం మనీద్.

Konda: కొండ బాసడు నెగ్గి కబ్బు
Konda Dora New Testament which was published in
2006

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 6 May 2025 from source files
dated 7 May 2025

840896da-3a66-5e43-9018-4a95a349d60c